

# **Акафист Пресвятой Богородице пред Ея иконою, именуемой «Экономисса или Игумения горы Афонской»**

## **Кондак 1**

Избранной от сложения мира Пресвятей Деве Марии Богородице, воистину плотию рождшей Иисуса Христа Спаса и Бога нашего, яко Владычице вселенныя, зело возлюбившей Христа и взявшей под Свой державный покров их святыя обители, похвальное приносим пение. Ты же, Всечестная наша Мати Игумения, храни и спасай нас от всех врагов видимых и невидимых, да зовем Ти: Радуйся, Пресвятая Богородице Дево, святой горы Афона и всея вселенныя православных обителей Всечестная Игумения!

## **Икос 1**

Ангели плотию суще вси преподобнии отцы и матери, юноши и девы, от века просиявшии во святых и ныне православно шествующий в небесныя селения под сиянием Честнаго и Животворящаго Креста Христова, на земном поприще, во юдоли плача и скорбей, под державным покровительством Матери Христа Бога нашего, Всечестнейшия Игумении православнаго монашескаго жития. Еяже милостивному заступлению радостно взываем сице: Радуйся, Всечестнейшая наша Мати Игумения; Радуйся, надежде нашего спасения. Радуйся, горы Афонския Хранительнице; Радуйся, тамо живущих иноков Спасительнице. Радуйся, веселие и славо Христовых подвижников; Радуйся, отрадо Божественная святых пустынников. Радуйся, яко Тобою вси святии спасаются; Радуйся, яко вся вселенная Тобою украшается. Радуйся, миров бесчисленных о Бозе Владычице; Радуйся, вселения рая небеснаго Руководительнице. Радуйся, благий и славный конец всех святых жития; Радуйся, святая радости Божественныя струя. Радуйся, Пресвятая Богородице Дево, святой горы Афона и всея вселенныя православных обителей Всечестная Игумения!

## **Кондак 2**

Видящи скорбный путь спасения для всех преподобных Своих, Господь наш Иисус Христос благоволи Матери Своей Всечестней Деве Богородице, да прострет Она Свой Божественный покров игуменства над всеми святыми обителями святыя Афонския горы и всея вселенныя православнаго монашескаго спасения, да вси спасающиися в преподобии и святости, верою видящи сие, взывают непрестанно Спасителю Богу: Аллилуиа.

## Икос 2

Разум имуще Божественный вси преподобнии отцы и матери, от всея души возлюбивша славу небесную, мир же со всеми его прелестями возненавидевше и ногама поправше, шествоваху в подвизах святых за Христом в мире жития сего, безбедно руководимыя Своею Приснодевственною небесною Игумениею, Еяже верою зряще в лице Ея икон святых, умильно взывают тако: Радуйся, нашего спасения главизно; Радуйся, радости наша в сей и в будущей жизни. Радуйся, дивная Строительнице наших святых обителей; Радуйся, Экономиссо милосердая иноческих общежитий. Радуйся, цвете Божественного прозябения; Радуйся, радости всемирнаго воскресения. Радуйся, всех святых Божественное веселие; Радуйся, монашества украшение. Радуйся, Истинная Мати нашего Спасителя; Радуйся, яко плотию родила еси ада Победителя. Радуйся, яко на Афоне духовный сад насадила еси; Радуйся, яко тамо живущих в преподобии в рай руководила еси. Радуйся, Пресвятая Богородице Дево, святыя горы Афона и всея вселенныя православных обителей Всечестная Игумения.

## Кондак 3

Сила Вышняго осеняет всех, в преподобии и святости, и в правде живущих, иже возненавидеша суету мира сего и бежаша во святыя монашеския обители, и тамо во образе ангельском взявше на ся благое иго Христово свято подвизающесе, чрез все житие свое взывают непрестанно ко Пресвятой Троице Богу: Аллилуиа.

## Икос 3

Имуще пламенное желание спасения, вси соборы преподобных, просиявшии во святых от века, и ныне подвиги спасения совершающии во обителях иноческаго жития, в лаврах, монастырех, скитех, киновиях, келлиях и на всяцем месте всея вселенныя, имея дивный щит спасения — Божественное игуменство Матери Божией, хвалебно Ей песнопоят: Радуйся, Собирательнице наша среди мира греховнаго; Радуйся, Строительнице нашего спасения духовнаго. Радуйся, спасшая весь род Адама падшего; Радуйся, плотию рождающая неизреченно Спаса и Бога нашего. Радуйся, Всечестнейшая Монахиня, образе спасающимся; Радуйся, праведная Игумения всех нас, подвизающихся. Радуйся, веры православныя воеводо непобедимая; Радуйся, Божественная крепосте всеильная. Радуйся, Мати Господня и наша Благодатная; Радуйся, для всех святых благоприятная. Радуйся, двери милосердия для кающихся; Радуйся, упование о Бозе подвизающихся. Радуйся, Пресвятая Богородице Дево, святыя горы Афона и всея вселенныя православных обителей всечестная Игумения.

#### **Кондак 4**

Бурю сомнений грехолюбивых оставльше отцы преподобныя и матери, возлюбиша тернистый путь спасения, живуще среди скорбей и лишений, Царствия ради Небеснаго, украсивше своим Богоугодным житием премоногия места вселенныя, идеже основаше святыя обители иноческаго спасения, в нихже спасающесея, присно поют Ангельскую песнь Христу Богу нашему: Аллилуиа.

#### **Икос 4**

Слышаша святыя глаголы Христова Евангелиа, избранницы небесныя, вся презревше суетная мира сего, в путь святой поидоша, нося благое иго Спаса нашего житием своим, во плоти Ангелом святым уподобишася, имея предивную Игумению над всеми их святыми обителями по всей вселенней яко звезды небесныя сияющими, к Нейже вопиют всегда: Радуйся, премудрая Игумение монашества православного; Радуйся, спасение народа Богоизбраннаго. Радуйся, столпе девства и океане милосердия; Радуйся, вечная отрадо райскаго веселия. Радуйся, прибежище кающихся грешников; Радуйся, сокровище убогим подвижником. Радуйся, всю вселенную любовью покрывающая; Радуйся, славою Небесною сатану во ад низвергающая. Радуйся, Божественная радости Ангелов и человеков; Радуйся, яко плач принесла еси демоном во веки. Радуйся, единая надеждо веры православныя; Радуйся, Мати Господня и наша Всеславная. Радуйся, Пресвятая Богородице Дево, святыя горы Афона и всея вселенныя православных обителей Всечестная Игумение.

#### **Кондак 5**

Боготечную жизнь праведницы проидоша и Небеснаго Отечества с радостию достигоша, веселятся, о Господе, со Ангелы святыми во вся веки, мы же их собратия, подвизаемся во святых обителях, поюще хвалебныя песни Богу: Аллилуиа.

#### **Икос 5**

Видеша избранницы Господни скоропреходящую славу мира сего: богатство непостоянно, счастье скоротечно, скорби же, печали и отчаяние, и всякия злоключения присныя спутницы жизни сея есть, в конце же смерть телесная всем людем неизбежна. Святою же верою вечныя селения созерцаху, возлюбиша тесный и прискорбный путь монашескаго жития, идеже Пресвятая Матерь Самаго Господа игуменствует, руководя спасающимися духовными чадами Ея, хвалебно к Ней взывающими: Радуйся, единое спасение душ наших; Радуйся, райское утешение всех скорбящих. Радуйся, святыя горы Афонския Просветительнице; Радуйся, всея вселенныя

Покровительнице. Радуйся, надежное прибежище всем кающимся; Радуйся, тихое пристанище от бед спасающимся. Радуйся, Лавры Печерския Строительнице; Радуйся, Почаевския обители Защитнице. Радуйся, Экономиссо лавры Афанасия Афонскаго; Радуйся, книго Христова Завета Новосионскаго. Радуйся, всех святых во едино собравшая; Радуйся, христианом православным путь в рай указавшая. Радуйся, Пресвятая Богородице Дево, святяя горы Афона и всея вселенныя православных обителей Всечестная Игумение.

### **Кондак 6**

Проповедницы богатнаго равноангельскаго жития во плоти явишася отцы преподобнии: Антоний Великий, Пахомий, Макарий, Феодосий и прочии преподобныя отцы и матери, ихже житию сонмы последоваша всех преподобных, наследницы бывше райских обителей со всеми святыми, и мы им ныне подражающе, во Ангельстем чине живуще, воспеваем Спасителю мира хвалебныя гласы: Аллилуиа.

### **Икос 6**

Возсия образ жития равноангельскаго для всех ищущих спасения: вдали от всех сует мирских примером Самаго Христа и Бога нашего и Его Пречистыя Матере Приснодевы Марии Богородицы, Предтечи Господня Иоанна и премногих святых угодников, ихже житию подражают вси преподобнии и под державным водительством Владычицы Вселенныя, Всечестнейшия Игумении Православно-монашеских обителей Марии Богородицы, хвалимой от всех святых предивными похвалами сице: Радуйся, православнаго монашества Мати Игумение; Радуйся, их ангельскаго жития вечное спасение. Радуйся, Благая Наставнице на путь небесныя жизни; Радуйся, Настоятельнице монашеския отчизны. Радуйся, скорая защито сиротствующих; Радуйся, яко подвижником святым венцы всегда готовиши. Радуйся, всех праведников любящая; Радуйся, кающихся грешников милующая. Радуйся, яко Твоя любовь Божией любви уподобляется; Радуйся, яко Тобою всякая тварь о Господе спасается. Радуйся, радости Божественнаго веселия; Радуйся, мира всего покрове и спасение. Радуйся, Пресвятая Богородице Дево, святяя горы Афона и всея вселенныя православных обителей Всечестная Игумение.

### **Кондак 7**

Хотящу скорбный путь к небеси благоустроити, Господь наш Иисус Христос благоволи Матери Своей, да игуменствует над всеми православными иноческими обительми по всей вселенней сущими, руководя в селения небеснаго рая сонмы избранников, ищущих спасения и поющих Избавителю Богу нашему: Аллилуиа.

### **Икос 7**

Новую жизнь образом Ангельскаго жития показаша отцы преподобнии и матери, зане вся оставльше сладости мира греховнаго и возлюбиша шествовати к Небеси путем Царя Славы Христа Бога нашего, крестными страданьми, и быша мученицы без крови, терпящи вся злая Царствия ради Божия, еже и получиша, и ныне сонмы преподобных шествуют таковым путем, водимыя Материю Божию, яко Всечестнейшею Игуменею их преподобнаго жития, превозносимую от них хвалами: Радуйся, Мати Господа, Судии Всеправеднаго; Радуйся, во игумениих от века предъизбранная. Радуйся, чистотою телеси тварь превозшедшая; Радуйся, святостию Своя души Небеса украсившая. Радуйся, благовестие Небеснаго Отечества; Радуйся: духовный крине православнаго монашества. Радуйся, усердная Молитвеннице о всех православных; Радуйся, Благая Строительнице для святых избранных. Радуйся, тихое пристанище всем странствующим; Радуйся, покоище блаженной старости. Радуйся, Невесто невестная; Радуйся, Пресвятая Богородице Дево, святыя горы Афона и всея вселенныя православных обителей всечестная Игумение.

### **Кондак 8**

Странное житие имуще, Христовы избранницы, оставльше телесныя страсти и утехи, возлюбиша путь крестных страданий в пустынях, на островах, в расселинях скал, в дубравех, со зверьми живуще равноангельно, идеже устроиша Божию волею святыя обители, в нихже воспеваху чрез все житие свое херувимски ко Господу: Аллилуиа.

### **Икос 8**

Весь бых Всемогущий Бог во умех и сердцах избранных Своих угодников, по реченному: «Дивен Бог во святых Своих», прославляя святыя Своя, собираяй из среды мира греховнаго, водворяя во святыя обители, да хвалится ими святое Имя Его, со святыми Ангелы во веки, и Владычица Богородица, Всеблагая Матерь Господня премудро игуменствует, спасая от бед и скорбей смиренно восхваляющих милость Ея: Радуйся, Честнейшая всея твари и всея вселенныя; Радуйся, сладчайшая, яко Божие селение. Радуйся, святой покрове жизни нашея; Радуйся, Божественный источнике сладости сладчайшия. Радуйся, вся наша надежде спасения и покой; Радуйся, по Бозе наше упование в жизни земной. Радуйся, яко воскресе Сын Твой и Господь; Радуйся, яко Он воскресит всякую плоть. Радуйся, Юже воспевают Небесныя Воинства; Радуйся, хвалимая от всех святых по достоинству. Радуйся, великая радости моего спасения; Радуйся, всего мира Божественное утешение. Радуйся, Пресвятая

Богородице Дево, святые горы Афона и всея вселенная православных обителей Всечестная Игумение.

### **Кондак 9**

Всякое мудрование земное презревше, святые угодницы яко юродии Христа ради явишася, бегая и странствующи на земли, не имуще нигде телеснаго, еже получиша, и мы им подражаем житием, подвигами и любовью ко Господу, Егоже и восхваляем, Ангельски поюще: Аллилуиа.

### **Икос 9**

Витии премудрости Господней явишася отцы преподобнии: Пахомий Великий, Антоний Великий и Макарий Египетский и всех православных иноков начальницы, просиявши во святых, ибо своим святым житием равноангельским на земли и словесами спасения спасоша премногия сонмы учеников, истинных рабов Христовых, по всей вселенной велением Пресвятыя Троицы под державным игуменством Владычицы Богородицы, Юже от всея души всегда хвалиша тако: Радуйся, Державная Владычице вселенная; Радуйся, Игумение нашего спасения. Радуйся, Бога Отцов Дщере вселюбезная; Радуйся, Материю Сына Божия быти сподобилася еси за святость и смирение. Радуйся, Бога Духа Святаго прекрасная Палато; Радуйся, на небеси и на земли любовь Всебогатая. Радуйся, инокине Честнейшая Херувимов; Радуйся, яко Мать Бога Превышшая Серафимов. Радуйся, Апостолов Христовых всемудрое учение. Радуйся, всех святых оправдание; Радуйся, помощи наша в земных страданиях. Радуйся, Пресвятая Богородице Дево, святые горы Афона и всея вселенная православных обителей Всечестная Игумение.

### **Кондак 10**

Спаси хотя род человеческий, Господь наш Иисус Христос сошед с небесе во юдоль плача и скорбей и Своими страданиями Божественнаго жития подаде пример для всех святых, желающие достигнути вечнаго покоя, в преподобии и правде хвалящих Его Ангельскими гласы: Аллилуиа.

### **Икос 10**

Стена крепости Божественная явилася еси, наша Всечестная Мати Игумение, охраняя, спасая, покрывая вся святые обители иноческия жизни во святей горе Афонстей и по всей вселенной, от зари веры христианския и до дне Страшнаго Суда Христова, спасая Божественною милостию преподобная Своя, присно хвалящая Ея щедроты сими словесы: Радуйся, Пресвятая Мати Игумение; Радуйся, источнице духовнаго воскресения. Радуйся, всю вселенную

покрывающая; Радуйся, святую Церковь Христову увеселяющая. Радуйся, пророческая славо и венче; Радуйся, и моя жизни блаженный конече. Радуйся, краше неба и сладше рая; Радуйся, примере для святого жития. Радуйся, любящая Свой жребий Афон; Радуйся, украшающая Иерусалим и Сион. Радуйся, Мати Милосердаго Судии; Радуйся, проливающая о мире слезныя струи. Радуйся, Пресвятая Богородице Дево, святые горы Афона и всея вселенныя православных обителей всечестная Игумение.

### **Кондак 11**

Пение всеумилненное приносят вси святии в небесных селениях райских, со святыми Ангелы хваляще и превозносяще Пресвятую Троицу: «Свят, Свят, Свят», — вопиют, и мы, православнии иноцы, верую сие зряще, вопием непрестанно к Богу нашему: Аллилуиа.

### **Икос 11**

Светопримную свещу православнаго жития соборы преподобных приемши, со всеми святыми, просиявшими от века, уже впереди, тако и ныне в путь небесный шествуют, имея Всемогущую о Господе Владычицу Матерь Еммануилову яко Игумению их преподобнаго жития, с радостью вопиют к Ней похвалами сие: Радуйся, подающая нам образ смирения; Радуйся, Собирательнице наша во обители спасения. Радуйся, Игумение святых Афонских горы; Радуйся, Настоятельнице всех святых монастырей. Радуйся, монахине житием всечестная; Радуйся, во бранех всеильнейшая. Радуйся, живых и мертвых Спасительнице; Радуйся, сиротствующих Мати благодатная. Радуйся, в скорби сущих отрадо приятная; Радуйся, спасение православных христиан. Радуйся, святых щедрот Божественный океане; Радуйся, Пресвятая Богородице Дево, святые горы Афонских и всея вселенныя православных обителей Всечестная Игумение.

### **Кондак 12**

Благодать подает всегда, Пресладкий Спаситель наш, всем святым рабом Своим, в преподобии и святости подвигающимся на поприще земнаго жития, ибо уже сонмы святых православных Православною Церковию в райских селениях воспевают Пресвятую Троицу со всеми Небесными силами, и мы им подражающе, вопием Дивному во святых Богу: Аллилуиа.

### **Икос 12**

Поюще вся милости Господни и щедроты к нам, недостойным инокам, присно ниспосылаемая, и всечестное Игуменство над всеми

нашими обителями наша Всеблагодатная Владычица Богородица, радуемся Божественно и веселимся, яко сподобившиися спасение совершати в тех обителях, идеже уже премногия сонмы преподобных подвижников достигоша Небеснаго Царствия, ихже святыми молитвами по милости Божией и под святым Покровом наша Небесная Матере Игуменнии достигнем и мы райских селений за труды спасения похвальная, воспевая сице словеса: Радуйся, Пресвятая Богородице Дево; Радуйся, спасения нашего Помощнице. Радуйся, Игумение за всех Всещедрая; Радуйся, в преподобии Ты еси первая. Радуйся, покровом милости весь мир покрывающая; Радуйся, сирот странных питающая. Радуйся, юным целомудрия Наставнице; Радуйся, о всех людех благая Печальнице. Радуйся, рода праотца Адама веселие; Радуйся, тихое пристанище спасения. Радуйся, Всещедрая наша Мати Игумение; Радуйся, благое начало и конец нашего песнопения. Радуйся, Пресвятая Богородице Дево, святая горы Афона и всея вселенная православных обителей Всечестная Игумение.

### **Кондак 13**

О Всепетая наша Мати Игумение, Преславная Владычице Богородице! Приими сия моления наша, от всея души Тебе ныне нами возносимыя и сподоби в чине Ангельстем достигнути Небеснаго Царствия, идеже вси святии, Ангели и чловецы, воспевают непрестанными гласы хвалу Пресвятей Троице Богу: Аллилуиа.

**(Это кондак читается трижды, затем 1-й икос и 1-й кондак)**